

CAP. XXI.

De sancto Antonio.

Antonius dicitur ab ana, quod est sursum, et tenens, quasi superna tenens et mundana despiciens. Despexit autem mundum, quia immundus, inquietus, transitorius, deceptivus, amarus. De his dicit Augustinus: o munde immunde, quid perstrepis? Quid avertere conaris? Nos tenere vis fugiens? Quid faceres, si maneres? Quem non deciperes dulcis, qui amarus dulcia alimenta mentiris? Ejus vitam Anastasius scripsit.

1. Antonius cum XX esset annorum et audiret legi in ecclesia: si vis perfectus esse, vade et vende omnia, quae habes et da pauperibus, omnia sua vendens pauperibus erogavit et eremiticam vitam duxit. Vir innumerabilia daemonum tentamenta sustinuit. Quadam vice dum spiritum fornicationis virtute fidei superasset, dyabolus in specie pueri nigri ante eum prostratus apparuit et se ab eo victum confessus est. Nam et hoc precibus impetravit, ut videret fornicationis daemonem juvenibus insidiantem: quem cum in praedicta forma vidisset, dixit: vilissima mihi apparuisti specie, te ultra non timebo. Alia vice dum in quodam tumultu latitaret, multitudo daemonum eum adeo laceravit, quod minister ejus quasi mortuum eum propriis humeris asportaret, cumque eum omnes, qui convenerant, quasi mortuum plorassent, dolentibus cunctis subito Antonius reviviscit et a ministro ad praedictum tumultum se iterum portari fecit. Qui cum ibi ex dolore vulnerum prostratus jaceret, ex virtute animi ad conflictum daemones excitabat. Tunc illi in formis variis ferarum apparuerunt et eum iterum dentibus, cornibus et unguibus crudelissime laceraverunt. Tunc subito splendor mirabilis ibi apparuit et daemones cunctos fugavit, Antonius autem continuo sanatus est. Ibi que Christum adesse intelligens ait: ubi eras, bone Jesu? ubi eras? quare non a principio fuisti hic, ut me adjuvares et vulnera mea sanares. Cui dominus: Antoni, hic eram, sed expectabam videre certamentum: nunc autem, quia viriliter dimicasti, in toto orbe te faciam nominari. Tanti autem fervoris erat, quod, cum Maximianus imperator christianos occideret, ipse martires sequebatur, ut cum iis martyr fieri mereretur, et vehementer tristabatur, eo quod sibi mar-

tirium non daretur. — 2. Cum autem in alteram eremum pergeret. argenteum discum reperit et intra se sic dicere coepit: unde hic argenteus discus, ubi hominum vestigia nulla videntur? Si enim viatori cecidisset, utique prae sui magnitudine latere non posset. Hoc, dyabole, artificium tuum est, voluntatem tamen meam nunquam poteris immutare, et hoc dicens, discus ut fumus evanuit. Postmodum ingentem massam veri auri reperit, sed ut incendium aurum fugit, sicque ad montem fugiens XX annis ibi permansit innumeris coruscans miraculis. Quadam vice dum in spiritu raptus esset, totum mundum laqueis se invicem connectentibus plenum vidit. Qui exclamans ait: o quis istos evadet? et audivit: humilitas. Aliquando dum ab angelis in aëre elevaretur, adsunt daemones et ejus transitum prohibent, peccata ejus ab exordio natiuitatis ejus objicientes. Quibus angeli: non debetis illa narrare, quae Christi pietate jam sunt deleta. Si qua autem scitis, ex quo factus est monachus, illa proferte. Et cum in probatione deficerent, liber Antonius in sublime tollitur et liber deponitur. — — —

3. Narrat Antonius de se dicens: vidi aliquando dyabolum celsum corpore, qui se Dei virtutem et providentiam ausus est dicere et ait: quid vis, ut a me tibi detur, Antoni? At ego sputa in os ejus congemmans totum me in eum Christi nomine armatus ingessi et statim evanuit. Huic dyabolus aliquando in tanta proceritate apparuit, quod coelum capite tangere videretur. Quem cum Antonius, quis esset, interrogasset et ipse se satanam esse dixisset, addidit satanas: cur me sic impugnant monachi et maledicunt christiani? Cui Antonius: juste hoc faciunt, quia tuis saepe insidiis molestantur. Et ille: ego eos nequaquam molesto, sed ipsi invicem se conturbant, ego enim ad nihilum sum redactus, quia jam in cunctis partibus regnat Christus. Quidam sagittarius beatum Antonium gaudentem cum fratribus quadam vice conspexit et ei displicuit, cui Antonius: pone sagittam in arcu et trahe. Quod et fecit, eumque hoc secundo et tertio fieri mandasset, dixit sagittarius: tantum trahere potero, quod de ejus fractione dolebo. Cui Antonius: sic est in opere Dei, quoniam si supra mensuram tendere vellemus, citius frangeremur: expedit ergo rigorem aliquando relaxari. Hoc audiens ille aedificatus recessit. — — —

4. Interrogavit quidam Antonium dicens: quid custodiens placebo Deo? Et respondens dixit: quocumque vadis, semper Deum pro oculis tuis habeas, in his, quae agis, testimonium sacrae scripturae adhibeas. in quocun-

que loco sederis, non inde cito recedas. Haec tria custodi et salvus eris. Abbas quidam interrogavit Antonium dicens: quid faciam? Cui Antonius: non confidas in tua justitia, ventris et linguae sit tibi continentia et ne poenitearis de re transacta. Dixit iterum Antonius: sicut pisces, si in sicco tardaverint, moriuntur, ita et monachi extra cellam tardantes aut cum viris saecularibus immorantes a quietis proposito resolvuntur. Iterum dixit Antonius: qui sedet in solitudine et quiescit, a tribus bellis eripitur, scilicet auditus, locutionis et visus et contra unum tantummodo pugnam habebit, scilicet cordis. — — — 5. Quidam fratres cum quodam senes ad abbatem Antonium visitandum iverunt dixitque Antonius fratribus: bonum comitem habuistis senem hunc. Deinde dixit seni: bonos fratres invenisti tecum, abba? Cui ille: bonos quidem inveni, sed habitatio eorum non habet januam: quicunque enim vult, intrat in stabulum et solvit asinum. Hoc autem dicebat, quoniam omnia, quae erant in corde eorum, statim erant in ore. Dixit abbas Antonius: scire convenit, quoniam sunt tres motus corporales, unus quidem naturae, alius ex ciborum plenitudine, tertius ex daemone. Frater quidam renuntiaverat saeculo, sed non plene, quia quaedam adhuc sibi retinebat. Cui Antonius: vade et eme carnes, qui valens emit carnes et portans eas dum veniret, lacerabant eum canes. Cui Antonius: qui renuntiant saeculo et volunt habere pecunias, ita impugnat a daemonibus 1) discernuntur. Antonius dum in eremo taedio afficeretur, dixit: domine, volo salvus fieri et non permittunt me cogitationes meae. Et surgens exivit foras et vidit quemdam sedentem atque operantem et deinde surgentem et orantem. Erat autem angelus domini et dixit ei: sic fac et salvus eris. Cum quadam vice fratres de statu animarum ab Antonio quaesivissent, sequenti nocte vox vocavit eum dicens: surge et exi et vide. Et ecce vidit quemdam longum et terribilem caput usque ad nubes tollentem, qui quosdam pennatos ad coelum volare cupientes extensis manibus prohibebat et alios libere pervolantes retinere non poterat; et maximum gaudium mixtum cum nimio dolore audiebat et intellexit animarum illum esse adscensum et dyabolum prohibentem, qui quasdam obnoxias retineret et de sanctorum volatu, quos retinere non poterat, sic doleret. Aliquando dum cum fratribus operaretur Antonius, suspiciens in coelum eum tristem visionem vidisset, provo-

1) Ed. Pr. male describuntur legi.

latus ante Deum rogavit, ut futurum scelus averteret, fratribus vero super hoc eum interrogantibus cum lacrimis et singultibus dixit, quod inauditum scelus seculis immineret. Vidi, inquit, altare Dei a multitudine ¹⁾ equorum circumdatum, qui calcibus omnia discerpebant: magno enim turbine fides catholica subvertetur et homines jumentis similes Christi sacramenta diripient, factaque est vox domini dicens: abominabuntur altare meum. Post duos autem annos erumpentibus Ariani ecclesiae unitatem sciderunt, baptisterium et ecclesias polluerunt et super altaria christianos ad instar ovium mactaverunt. — — — **G.** Dux quidam Aegyptius Arianus nomine Ballachus cum ita ecclesiam Dei infestaret et virgines et monachos nudatos publice verberaret, sic ei scripsit Antonius: video iram Dei super te venientem: jam desine persequi christianos, ne ira Dei te occupet, qui proximum tibi minatur interitum. Infelix legit epistolam, irrisit et in eam ²⁾ exsecrans ad terram projecit ac portitores verberibus multis afficiens Antonio talia remandavit: quando tibi est tanta cura de monachis, ad te quoque perveniet nostri disciplina rigoris. Post quinque autem dies equum suum mansuetissimum insidens morsu ipsius equi ad terram projicitur et corrosis atque laceratis eruribus intra triduum expiravit. Cum quidam fratres verbum salutis ab Antonio quaesivissent, ait ille: audiistis dominum dicentem, si quis te percusserit in maxillam, praebere ei alteram. Dicunt ei: hoc implere non possumus. Et ille: saltem de una patienter ferte. Et illi: etiam nec haec possemus. ³⁾ Quibus Antonius: saltem ne velitis percutere magis, quam percuti. Et illi: nec hoc possemus. Tunc Antonius dixit discipulo suo: succos praepara fratribus istis, quia nimis delicati sunt: sola oratio necessaria est vobis. Haec in vitis patrum leguntur. Tandem beatus Antonius CV anno vitae suae fratres deosculans in pace quievit sub Constantino, qui coepit circa annum domini CCXXL.

1) Ed. Princ. legit loco verborum: equorum circumdatum tantum modo: circumdantium. 2) Recent. legunt exspuens 3) Verba quibus — possemus omittit Ed. Princ.